

## Pelajar 1

### TANDA-TANDA TI NUNJUKKA JALAI

“Jesus ngereja mayuh kereja ajih ti bukai di mua sida murid Iya, ti enda dituliska dalam bup tu. Tang utai tu ditulis ngambika kita arapka Jesus nya Kristus, Anak Allah Taala, lalu ulih pengarap kita ke Iya, kita tau bulih pengidup dalam nama Iya” (*John 20:30, 31*).

#### A Kereja ajih ba tikah di Kana (*John 2:1-11*):

##### ❖ Tanda ti madahka pun jalai.

“Jesus ngereja kereja ajih ti keterubah nya di Kana, di menua Galili, alai Iya ke mandangka mulia Iya. Sida murid Iya lalu arapka Iya” (*John 2:11*).

- Ai anggur ke abis lebu mayu pengerami tikah tentu deka ngemalu orang ke jadi melakibini. Tang ari berekat Jesus ke masuk champur, sida ulih meri “ai anggur ke manah” nyadi ke punchak pengerami seduai (*John 2:1-10*).
- Lebu ke nerangka pengawa ajih tu, John ngiring runding kitai ari ai—ti nyadi lambang penuchi (*John 2:6*)—ngagai ai anggur ti baru—lambang penebus (*1 Kor. 11:25*).
- Pengawa ajih tu nyadi ke tanda kaul Jesus enggau Moses, nya alai Jesus lalu dikelala endang amat nabi/Mesiah baka ke dipadah Iya (*Ulang 18:15*).

#### B Kereja ajih ba siku anak pemesai (*John 4:46-54*):

##### ❖ Tanda ungkup orang ke nadai arap.

“Tu kereja ajih ti kedua ti dikereja Jesus udah beka Iya ke pulai ari menua Judea ngagai menua Galili” (*John 4:54*).

- Siku pemesai perintah ke diau di Kapernaum tusah ati kategal anak Iya ke sakit, ari nya Iya lalu nemuai ke Kana, laban deka minta Jesus datai lalu ngeraika anak lelaki Iya (*John 4:46-47*). Enti Jesus ngereja tu, Iya tentu deka arap.
- Chara Jesus mutarka penusah tu nunjukka Iya nemu amat runding siku pemesai tu (*John 4:48*). Semuti pengawa ajih aja tentu enda ulih nyadi ke bukti Jesus nya endang amat Mesiah [laban Sitan mega nemu ngereja pengawa ajih] (*P-sut 7:22; Pem. 13:13*).
- Pemesai tu deka ngaga pemutus sekaligus Iya arap tauka enda ngagai Jesus sebedau ajih tu digaga. Taja cherita nadai nyebut pekara nya, tang kitai ulih beperagamka Iya ke nyau enggau ai mata minta nyawa anak Iya, ke bepanggai bendar ba pengarap Iya empu (*John 4:49*).
- Kategal ari jaku Jesus Empu, tang lalu apin bisi bukti ke kereja ajih tu amat deka nyadi, Iya pen lalu arap (*John 4:50*). Tu meh pengarap ke dikembuan Iya lebu ti bekejang pulai, ke alai Iya lalu bemalam ba rantau jalai. Lebu orang madahka anak Iya udah gerai, Iya semuti deka nentuka anak Iya amat gerai ba timpuh Jesus bejaku (*John 4:51-53*).

#### C Kereja ajih ba letung Betsata (*John 5:1-47*):

##### ❖ Tanda orang ti putus pengarap.

“Lebu Jesus meda Iya, lalu nemu Iya endang lama udah gali dia, Iya lalu bejaku ngagai orang nya, “Kati nuan ingin digeraika?” ” (*John 5:6*).

- 38 taun tu timpuh ke udah chukup lama. Ari raban orang sakit ke begelumu ba letung Betsata, Jesus milih siku ke balat agi udah putus pengarap (*John 5:1-5*).
- Orang ke sakit tu nemu ari tanya Jesus ke siru, Iya nemu bisi orang ti deka nulung Iya (*John 5:6-7*). Jesus enda nulung Iya ngereja pengawa berubat ke tesat. Iya semina diasuh: “Angkat nuan. Bai tikai nuan, lalu bejalai” (*John 5:8*).
- Ari jaku Jesus, orang ke sakit lalu senurut. Iya angkat, kaki Iya ke udah lumpuh 38 taun lalu bisi pengering. Iya ke ngaga kaki, udah mulaika kaki Iya gerai baru baka selama.
- Lepas nya, Jesus lalu madahka penyakit Iya datai ari dosa ke digaga Iya empu (*John 5:14*). Nya alai, sekaligus penyakit nya datai terus ari dosa kitai tauka enda. Tuhan endang

bisi kuasa ngeraika penyakit kitai, enda ngira ari ni asal penatai penyakit nya (*James 5:14-15*).

❖ **Tanda ungkup orang ti enggai mereti.**

“Nya alai orang Judah belabuh ngenusahka Jesus, laban Iya ngereja utai nya lebu hari Sabat.” (*John 5:16*).

- Enti nitika pematut, orang ke udah gerai tentu deka pulai ke rumah mai rangka utai ke dikembuan iya. Tang ditu, iya disebut ngelanggar Sabat! (*John 5:10*). Lebu ke ditekanka salah, orang tu ngelaban lalu madahka iya ngereja pengawa nya ari asuh orang ke udah ngeraika iya (*John 5:11-13*).
- Nyadang bala orang tu deka muji orang ti udah meri pengerai tu, lalu nemu mega Jesus ke udah ngeraika iya, iya lalu belanda madahka sida (*John 5:14-15*).
- Nadai orang nerima pengawa ajih ke digaga Jesus enggau chara ti sama (*John 5:16*). Jesus nemu pengawa Iya ke ngasuh orang bajung ngesan peninduk lebu hari Sabat tentu deka numbuhka pemenchi. Tang tuju iya deka ngasuh bala munsuh Iya berunding, ni bagi ti beguna agi, tradisi tauka ngeraika orang. Nya alai nama kebuah sida bangat enggai amat meretika pekara tu?

❖ **Tanda ke disukung bala saksi.**

“Ketegal nya orang Judah bebendar agi deka munuh Iya, laban Iya ukai semina ngelanggar adat hari Sabat, tang mega ngumbai Allah Taala Apai Iya, lalu ari nya ngaga Diri sebaka enggau Allah Taala” (*John 5:18*).

- Lebu Jesus disebut pengelanggar hari Sabat, saut Iya ngagai orang, “Apai Aku seruran gawa. Lalu Aku Empu mega gawa” (*John 5:17*). Jaku tu meri penetap ke Jesus endang amat Allah Taala (*John 5:18*).
- Jesus ngering diri ngena 3 chara:
  - (1) Kaul Iya enggau Apai (*John 5:19-30*). Tu meri Iya kuasa ngakim sereta ngangkatka orang mati.
  - (2) Bala saksi ti netapka pengamat ambu Iya:
    - (a) John Pemptisa (*John 5:31-35*).
    - (b) Kereja ajih ke digaga Iya (*John 5:36*).
    - (c) Apai (*John 5:37-38*).
    - (d) Bup Kudus (*John 5:39*).
  - (3) Pengeras ati orang ti besalahka Iya (*John 5:40-47*). Moses ke dikarapka sida, tentu deka nyalah sida laban sida enda arapka orang ti disebut iya.

“Dalam injil meh perangai Kristus dipandangka. Lebu iya nurun belubah-lubah ari penuduk raja Iya, pengidup Petara ke bisi ba Iya lalu dilalaika ba mensia; tang dalam pengawa ajih Iya, ajar Iya, enggau pemerinsa Iya, semua tu nyadi pesaka pintar ke ditulis ba jaku Tuhan ungkup kitai. Timpuh endang nadai chukup dikena mansik semua pengawa nyelai pasal penyelamat, tang ba sepanjangi timpuh belama-ia, Kristus meh ti deka nyadi sains enggau lagu ungkup orang ti udah ditebus. Pemansang baru pasal mulia Tuhan ke ayan ba mua Jesus Kristus deka seruran bisi belama ia. Nya alai diatu kitai enda tau enda enggau penuh bepanggai ba pemanah enggau pengasih Iya, enda bepanggai ba diri empu, tang patut ngembuan pengarap ti idup ba Iya.”

EGW (Lift Him Up, January 26)